

## Santai Berbasikal Semarakkan Hari Malaysia



Kuantan, 16 September- Lebih 100 orang mengambil bahagian dalam program berbasikal UMP Fun Ride sejauh 40 km anjuran Pusat Sukan Universiti Malaysia Pahang (UMP) yang berlangsung dari UMP Pekan ke sekitar bandar Pekan.

Hadir melepaskan peserta di Pusat Aktiviti Pelajar adalah Naib Canselor UMP, Prof Dato Dr Daing Nasir Ibrahim. Hadir sama Timbalan Naib Canselor (Hal Ehwal Pelajar dan Alumni), Prof Dato Dr Yuserrie Zainuddin dan Pengarah Pusat Sukan dan Kebudayaan, Abd Rahman Hj Safie.

Menurut Prof Dato Dr Daing Nasir, program sukan berbasikal ini dianjurkan sejajar dengan Pelan Strategik UMP 2016 - 2020 dalam Menjana Kegemilangan seterusnya menjadikan UMP sebagai Universiti Teknologi Terunggul dengan menyediakan kepelbagaian aktiviti membudayakan gaya hidup sihat.

"Program ini adalah sebahagian daripada aktiviti menyemarakkan sambutan Hari Malaysia serta dapat memperkenalkan kampus UMP kepada masyarakat sekeliling," katanya.



Selain itu, menyokong usaha Universiti dalam memperkenalkan budaya dan tempat menarik di Negeri Pahang terutamanya di Pekan bersempena Tahun Melawat Pahang serta memperkenalkan UMP sebagai Pusat Edu-Tourism Pahang. Antara laluan peserta melibatkan Tanjung Selangor, Tanah Putih, Muzium Pekan, Padang Polo dan Kg Marhum.

Dalam pada itu, universiti juga bakal mengadakan Pertandingan 1st UMP Edu-Tourism Beach Run 17 di UMP Pekan pada 12 November depan dalam menarik minat orang ramai menyaksikan keindahan sekitar kampus termasuklah lokasi tumpuan Medan Ikan Bakar Kuala Pahang dan Pantai Lagenda.





Posted By : NORHIDAYAH BINTI MOHAMAD Date Posted : 20-09-2017, 09:07:50